

Mangsa banjir perlu sentiasa patuh SOP

Kuala Lumpur: Mangsa banjir diingatkan supaya sentiasa mematuhi prosedur operasi standard (SOP) sepanjang bencana ini agar penularan Covid-19 dapat dikawal sepenuhnya.

Menteri Kanan (Kluster Keselamatan) Datuk Seri Ismail Sabri Yaakob berkata, kerajaan menyediakan SOP yang perlu dipatuhi mangsa dan agensi terbabit dalam pemindahan dan sepanjang berada di pusat pemindahan sementara (PPS).

Menurutnya, Jawatankuasa Pengurusan Bencana Daerah (JPBD) juga diminta menyediakan PPS yang lebih banyak bagi mengelakkan kesesakan jika pertambahan mangsa berlaku di sesebuah kawasan.

“Proses pemindahan

mangsa ke PPS perlu mematuhi Garis Panduan Pengurusan PPSCOVID-19 dan mengikut nasihat Kementerian Kesihatan Malaysia (KKM) seperti menjaga penjarakan fizikal serta memakai pelitup muka setiap masa.

“Mangsa yang dipindahkan ke PPS perlu disaring dan kemudian ditempatkan dengan mematuhi aspek penjarakan fizikal.

“Jawatankuasa PPS boleh menempatkan ahli keluarga dalam kubikel yang sama dan bagi mangsa yang bergejala akan dirujuk ke klinik kesihatan dan kemudian diasingkan di ruang pengasingan khas yang disediakan,” katanya pada sidang media harian Covid-19 di sini, semalam.